

關聖帝君覺世真經：

帝君曰：

人生在世，貴盡忠孝節義等事，方於人道無愧，可立身於天地之間。

若不盡忠孝節義等事，身雖在世，其心已死，是為偷生。

凡人心即神，神即心，無愧心，無愧神，若是欺心，便是欺神。

故君子三畏四知，以慎其獨。

勿謂暗室可欺，屋漏可愧，一靜一動，神明鑒察。

十目十手，理所必至，況報應昭彰，不爽毫髮。

淫為萬惡首，孝為百善先。

但有逆理，於心有愧者，勿謂有利而行之；

凡有合理，於心無愧者，勿謂無利而不行。

若負吾教，請試吾刀。

敬天地、禮神明，奉祖先、孝雙親，守王法、重師尊；

愛兄弟、信朋友，睦宗族、和鄉親，敬夫婦、教子孫；

時行方便，廣積陰德，救難濟急，恤孤憐貧；

創修廟宇，印造經文，捨藥施茶，戒殺放生；

造橋修路，矜寡拔困，重粟惜福，排難解紛；

捐資成美，垂訓教人，冤讎解釋，斗秤公平；

親近有德，遠避凶人，隱惡揚善，利物救民；

回心向道，改過自新，滿腔仁慈，惡念不存；

一切善事，信受奉行，人雖不見，神已早聞；

加福增壽，添子益孫，災消病減，禍患不侵；

人物咸寧，吉星照臨，若存惡心，不行善事；

淫人妻女，破人婚姻。

壞人名節，損人技能，謀人財產，唆人爭訟；

損人利己，肥家潤身，咒天怨地，罵雨呵風；

謗聖毀賢，滅像欺神，宰殺牛犬，穢溺字紙；

恃勢欺善，倚富壓貧，離人骨肉，間人兄弟；

不信正道，奸盜邪淫，好尚奢詐，不重勤儉；

輕棄五穀，不報有恩，瞞心昧己，大斗小秤；

假立邪教，引誘愚人，詭說升天，斂物行淫；

明瞞暗騙，橫言曲語，白日咒詛，背地謀害；

不存天理，不順人心，不信報應，引人做惡；

不修片善，行諸惡事，官詞口舌，水火盜賊；

惡毒瘟疫，生敗產蠱，殺身亡家，男盜女淫；

近報在身，遠報子孫，神明鑒察，毫髮不紊；

善惡兩途，禍福攸分，行善福報，作惡禍臨；

我作斯語，願人奉行，言雖淺近，大益身心。
戲侮吾言，斬首分形。有能持誦，消凶聚慶。
求子得子，求壽得壽。富貴功名，皆能有成。
凡有所祈，如意而獲。萬禍雪消，千祥雲集。
諸如此福，惟善所致。吾本無私，惟佑善人。
眾善奉行，毋怠厥志。